

文選正文

山子點

五

~ 16
3344
6



門△16
號3344
卷6

文選正文卷之五

詩類

補亡詩六首

四言并序

束皙

南陔孝子相戒以養也

循彼南陔言採其蘭眷戀庭闈心不遑安彼居之子罔或游
盤馨爾夕膳潔爾晨餐循彼南陔厥草油油彼居之子色思
其柔眷戀庭闈心不遑留馨爾夕膳潔爾晨羞有獺有獺在
河之淡凌波赴汨噬魴捕鯉噉噉林鳥受哺于子養隆敬薄
惟禽之似曷增爾虔以介丕祉

白華孝子之潔白也

白華朱萼被於幽薄粲粲門子如磨如錯終晨三省匪惰其

昭
41年12月20日
原安三郎氏贈

恪白華絳趺在陵之陬。蒨蒨士子，涅而不渝。竭誠盡敬，疊疊忘劬。白華玄足，在丘之曲。堂堂處子，無營無欲。鮮伴晨葩，莫之點辱。

可華黍時和歲豐，宜黍稷也。

黼黻重雲，習習和風。黍華陵巔，麥秀丘中。靡田不播，九穀斯豐。奕奕玄霄，濛濛甘露。黍發稠華，禾挺其秀。靡田不殖，九穀斯茂。無高不播，無下不植。芒芒其稼，參參其穡。穡我王委，充我民食。玉燭陽明，顯猷翼翼。

由庚萬物得由其道也。

蕩蕩夷庚，物則由之。蠢蠢庶類，王亦柔之。道之既由，化之既柔。木以秋零，草以春抽。獸在于草，魚躍順流。四時遞謝，八風

代扇織阿，案晷星變。其躔五緯，不愆六氣。無易悄悄，我王紹

文之跡。

崇丘萬物得極其高大也。

瞻彼崇丘，其林藹藹。植物斯高，動物類斯大。周風既洽，王猷允泰。漫漫方輿，迴迴洪覆。何類不繁，何生不茂。物極其性，人永其壽。恢恢大圓，茫茫九壤。資生仰化，于何不養。人無道天，物極則長。

由儀萬物之生各得其儀也。

肅肅君子，由儀率性。明明后辟，仁以為政。魚遊清沼，鳥萃平林。濯鱗鼓翼，振振其音。賓寫爾誠，主竭其心。時之和矣，何思何修。文化內輯，武功外悠。

述祖德詩二首 五言

謝靈運

達人貴自我，高情屬天雲。兼抱濟物性，而不纓垢氛。段生藩
 魏國，展季救魯人。弦高犒晉師，仲連却秦軍。臨組乍不緤，對
 珪寧肯分。惠物辭所賞，勵志故絕人。苕苕歷千載，遙遙播清
 塵。清塵竟誰嗣，明哲時經綸。委講綴道論，改服康世屯。屯難
 既云康，尊主隆斯民。晉師當是秦師。蓋似作者誤。
 中原昔喪亂，喪亂豈解已。崩騰永嘉末，逼迫太元始。河外無
 反正，江介有賊比。萬邦咸振懼，橫流賴君子。拯溺由道情，龕
 暴資神理。秦趙欣來蘇，燕魏遲文軌。賢相謝世運，遠圖因事
 止。高揖七州外，拂衣五湖裏。隨山疏濬潭，傍巖藝枌梓。遺情
 捨塵物，貞觀丘壑美。

諷諫詩

并序四言

韋孟

孟為元王傅，子夷王及孫王。戊戌荒淫不遵道，作詩諷諫。
 肅肅我祖國，自豕韋黼衣。朱黻四牡龍旂，彤弓斯征。撫寧遐
 荒，總齊羣邦。以翼大商，迭彼大彭。勲績惟光，至于有周。歷世
 會同，王赧聽譖。寔絕我邦，我邦既絕。厥政斯逸，賞罰之行。非
 由王室，庶尹羣后。靡扶靡衛，五服崩離。宗周以隆，我祖斯微。
 遷于彭城，在予小子。勤唉厥生，阨此嫚秦。耒耜斯耕，悠悠嫚
 秦。上天不寧，乃眷南顧。授漢于京，於赫有漢。四方是征，靡適
 不懷。萬國攸平，乃命厥弟。建侯于楚，俾我小臣。惟傅是輔，矜
 矜元王。恭儉靜一，惠此黎民。納彼輔弼，享國漸世。垂烈於後，
 乃及夷王。尅奉厥次，咨命不永。惟王統祀，左右陪臣。斯惟皇

士如何我王不思守保不惟履冰以繼祖考邦事是廢逸游
是娛犬馬悠悠是放是驅務此鳥獸忽此稼苗蒸民以遺我
王以媮所弘匪德所親匪俊唯囿是恢唯諛是信諭諭諂夫
諤諤黃髮如何我王曾不是察既藐下臣追欲縱逸媮彼顯
祖輕此削黜嗟嗟我王漢之睦親曾不夙夜以休令聞穆穆
天子照臨下土明明羣司執憲靡顧正遐由近殆其茲怙嗟
嗟我王曷不斯思匪思匪監嗣其罔則彌彌其逸岌岌其國
致冰匪霜致墜匪慢瞻惟我王時靡不練興國救顛孰違悔
過追思黃髮秦繆以霸歲月其徂年其逮考於赫君子庶顯
于後我王如何曾不斯覽黃髮不近胡不時鑒

勵志詩

張華

大儀幹運天廻地游四氣鱗次寒暑環周星火既夕忽焉素
秋涼風振落熠燿宵流其一吉士思秋寔感物化日歎月歎
在苒代謝逝者如斯曾無日夜嗟爾庶士胡寧自念其二
道不遐德輜如羽求焉斯至衆鮮克舉大猷玄漠將抽厥緒
先民有作貽我高矩其三雖有淑姿放心縱逸出般丁游居
多暇日如彼梓材弗勤丹漆雖勞朴斲終負素質其四養出
矯矢獸號于林蒲盧縈繳神感飛禽末伎之妙動物感心研
精耽道安有幽深其五安心恬蕩棲志浮雲體之以質彪之
以文如彼南畝力未既勤蔗菽致功必有豐殷其六水積成
川載瀾載清土積成山歆蒸鬱冥山不讓塵川不辭盈勉志
令弘以隆德聲其七高以下基洪由纖起川廣自源成人在

始累微以著乃物之理。繼率之長實累千里。其八復禮終朝。天下歸仁。若金受礪。若泥在鈞。進德修業。暉光日新。隰朋仰慕子亦何人。其九

上責躬應詔詩表

曹植

臣植言。臣自抱釁歸藩。刻肌刻骨。追思罪戾。晝分而食。夜分而寢。誠以天網不可重罹。聖恩難可再恃。竊感相鼠之篇。無禮遄死之義。形影相弔。五情愧赧。以罪棄生。則違古賢夕改之勸。忍垢苟全。則犯詩人胡顏之譏。伏惟陛下德象天地。恩隆父母。施暢春風。澤如時雨。是以不別荆棘者。慶雲之惠也。七子均養者。鳴鳩之仁也。舍罪責功者。明君之舉也。矜愚愛能者。慈父之恩也。是以愚臣徘徊於恩澤。而不敢自棄者也。

前奉詔書。臣等絕朝心。離志絕。自分黃耆。永無執珪之望。不圖聖詔。猥垂齒。在。今止之日。馳心輦轂。僻處西館。未奉闕庭。踊躍之懷。瞻望反側。不勝犬馬戀主之情。謹拜表并獻詩二篇。詞旨淺末。不足采覽。貴露下情。冒顏以聞。臣植誠惶誠恐。頓首頓首。死罪死罪。

責躬詩四言

於穆顯考。時惟武皇。受命于天。寧濟四方。朱旗所拂。九土披攘。玄化滂流。荒服來王。超商越周。與唐比蹤。篤生我皇。奕世載聰。武則肅烈。文則時雍。受禪于漢。君臨萬邦。萬邦既化。率由舊則。廣命懿親。以藩王國。帝曰爾侯。君茲青土。奄有海濱。方周于魯。車服有輝。旗章有叙。濟濟俊乂。我躬我輔。伊余小

子恃寵驕盈舉樹時網動亂國經作藩作屏先軌是墮傲我
皇使犯我朝儀國有典刑我削我黜將寘下理元凶是率明
明天子時惟篤類不忍我刑暴之朝肆違彼執憲哀予小子
改封充邑于河之濱股肱弗置有君無臣荒淫之闕誰弼余
身勞勞僕夫于彼冀方嗟予小子乃罹斯殃赫赫天子恩不
遺物冠我玄冕夏我朱紱光光大使我榮我華剖符授玉土
爵是加仰齒金璽俯執聖策皇恩過隆祗承怵惕咨我小子
頑凶是嬰逝慚陵墓有愧闕庭匪敢傲德寔恩是恃威靈改
加足以沒齒昊天罔極生命不圖常懼顛沛抱罪黃墟願蒙
矢石建旗東嶽庶立毫釐微功自贖危軀授命知足免戾甘
赴江湘奮戈吳越天啓其衷得會不畿連奉聖顏如渴如饑

心之云慕愴矣其悲天高聽卑皇肯照微

應詔詩

肅承明詔應會皇都星陳夙駕秣馬脂車命彼掌徒肅我征
旅朝發鸞臺夕宿蘭渚茫茫原隰祁祁十女經彼公田樂我
稷黍爰有樛木重陰匪息雖有糗糧饑不遑食望城不過面
邑不游僕夫警策平路是由玄駟藹藹揚鑣漂沫流風翼衡
輕雲承蓋涉澗之濱綠山之隈遵彼河澗黃坂是階西濟關
谷或降或升駢駘倦路載寢載興將朝聖皇匪敢晏寧再節
長驚指日遄征前驅舉燧後乘抗旌輪不輟運鑿無廢聲爰
暨帝室稅此西墉嘉詔未賜朝覲莫從仰瞻城闕俯惟闕庭
長懷永慕憂心如醒

關中詩

潘岳

於皇時晉受命既固三祖在天聖皇紹祚德博化光刑簡枉
 錯微火不戒延我寶庫其一蠢爾戎狄狡焉思肆虞我國膏
 窺我利器岳牧慮殊威懷理二將無專策兵不素肄其二翹
 翹趙王請徒二萬朝議惟疑未逞斯願桓桓梁征高牙乃建
 旗蓋相望偏師作援其三虎視眈眈威彼好時素甲日耀玄
 幕雲起誰其繼之夏侯士惟系惟處別營暴時其四夫豈
 無謀戎士承平守有完郭戰無全兵鋒交卒奔孰免孟明飛
 檄秦郊告敗上京其五周狗師令身膏氏斧人之云亡貞節
 克舉盧播違命投鼻朔土為法受惡誰謂荼苦其六哀此黎
 元無罪無辜肝腦塗地白骨交衢夫行妻寡父出子孤俾我

晉民化為狄俘其七亂離斯瘼日月其稔天子是矜肝食晏
 寢主憂臣勞孰不祗慙愧無獻納尸素以甚其八皇赫斯怒
 爰整精銳命彼上谷折日遄逝親奉成規稜威遐厲首陷中
 亭揚聲萬計其九兵固詭道先聲後實聞之有司以萬為一
 紂之不善我未之必虛鼎滿德繆彰甲吉其十雍門不啓陳
 汧危偏觀遂虎奮感恩輸力重圍克解危城載色豈曰無過
 功亦不測其十一情固萬端于何不有紛紜齊萬亦孔之醜
 曰納其降曰梟其首疇真可掩孰偽可久其十二既徵爾辭
 既蔽爾訟當乃明實否則證空好爵既靡顯戮亦從不見實
 林伏尸漢邦其十三周人之詩寔曰采薇北難獫狁西患昆
 夷以古况今何足矜威徒愍斯民我心傷悲其十四斯民如

何荼毒于秦師。旅旣加飢饉。是因疫癘淫行。荆棘成榛。絳陽之粟。浮于渭濱。其十五。明明天子。視民如傷。申命羣司。保爾封疆。靡暴于衆。無陵于強。惴惴寡弱。如熙春陽。其十六。

公讌詩 五言

曹植

公子敬愛客。終宴不知疲。清夜遊西園。飛蓋相追隨。明月澄清景。列宿正參差。秋蘭被長坂。朱華冒綠池。潛魚躍清波。好鳥鳴高枝。神飈接丹轂。輕輦隨風移。飄飄放志意。千秋長若斯。

公讌詩

王粲

昊天降豐澤。白卉挺歲蕤。涼風撤蒸暑。清雲却炎暉。高會君子堂。並坐蔭華榭。嘉肴充圓方。旨酒盈金罍。管絃發徵音。曲度清且悲。合坐同所樂。但愬杯行遲。常聞詩人語。不醉且無歸。今日不極歡。合情欲待誰。見眷良不翅。守分豈能違。古人有遺言。君子福所綏。願我賢主人。與天享巍巍。克符周公業。奕世不可追。

公讌詩

劉楨

永日行游戲。歡樂猶未央。遺思在玄夜。相與復翱翔。輦車飛素蓋。從者盈路傍。月出照園中。珍木鬱蒼蒼。清川過石渠。流波爲魚防。芙蓉散其華。菡萏溢金塘。靈鳥宿水裔。仁獸游飛梁。華館寄流波。豁達來風涼。生平未始聞。歌之安能詳。投翰長歎息。綺麗不可忘。

侍五官中郎將建章臺集詩

應瑒

朝。鴈。鳴。雲。中。音。響。一。何。哀。問。子。遊。何。鄉。戢。翼。正。徘徊。言。我。塞
門。來。將。就。衡。陽。棲。往。春。翔。北。土。今。冬。客。南。淮。遠。行。蒙。霜。雪。毛
羽。日。摧。頹。常。恐。傷。肌。骨。身。隕。沈。黃。泥。簡。珠。墮。沙。石。何。能。中。自
諧。欲。因。雲。雨。會。濯。翼。陵。高。梯。良。遇。不可。值。伸。眉。路。何。階。公。子
敬。愛。容。樂。飲。不知。疲。和。顏。既。以。暢。乃。肯。顧。細。微。贈。詩。見。存。慰
小。子。非。所。宜。爲。且。極。歡。情。不。醉。其。無。歸。凡。百。敬。爾。位。以。副。飢
渴。懷。公。麟。精。

齊。皇。太。子。宴。玄。圃。宣。猷。堂。有。令。賦。詩。四。言。陸。機

一。正。迭。紹。洪。聖。啓。運。自。昔。哲。王。先。天。而。順。羣。辟。崇。替。降。及。近
古。黃。暉。旣。渝。素。靈。承。祐。乃。眷。斯。顧。祚。之。宅。土。二。后。始。基。世。武
丕。承。協。風。傍。駭。天。啓。仰。澄。淳。曜。六。合。皇。慶。攸。興。自。彼。河。汾。奄

齊。七。政。時。文。惟。管。世。篤。其。聖。欽。翼。昊。天。對。揚。成。命。九。區。克。咸
讌。歌。以。詠。皇。上。纂。隆。經。教。弘。道。于。化。旣。豐。在。工。載。考。俯。釐。庶
績。仰。荒。大。造。儀。刑。祖。宗。爰。綏。天。保。篤。生。我。后。克。明。克。秀。體。輝
重。光。承。規。景。數。茂。德。淵。冲。天。姿。玉。裕。藁。爾。小。臣。邈。彼。荒。遐。弛
厥。負。擔。振。纓。承。華。匪。願。伊。始。惟。命。之。嘉

大將軍宴會被命作詩

陸雲

皇。皇。帝。祐。誕。隆。駿。命。四。祖。正。家。天。祿。安。定。獻。哲。惟。晉。世。有。明
聖。如。彼。日。月。萬。景。攸。正。其。一。巍巍。明。聖。道。隆。自。天。則。明。分。爽
觀。象。洞。玄。陵。風。協。紀。絕。輝。照。淵。肅。雍。往。播。福。祿。來。臻。其。二。在
昔。姦。臣。稱。亂。紫。微。神。風。潛。駭。有。赫。茲。威。靈。旗。樹。旆。如。電。斯。揮
致。天。之。屈。于。河。之。沂。有。命。再。集。皇。輿。凱。歸。其。三。頽。綱。旣。振。品

物咸秩神道見素遺華反質辰畧重光協風應律函夏無塵
海外有謚其四芒芒宇宙天地交泰王在華堂式宴嘉會玄
暉峻朗翠雲崇靄是弁振纓服藻垂帶其五祁祁臣僚有來
雍雍薄言載考承顏下風俯覲嘉客仰瞻玉容施已唯約于
禮斯豐天錫難老如岳之崇其六

晉武帝華林園集詩

應禎

悠悠太上民之厥初皇極肇建彝倫攸敷九德史運膺錄受
符陶唐既謝天歷在虞其一於時上帝乃顧惟眷光我先祚
應期納禪位以龍飛文以虎變玄澤滂流仁風潛扇區內宅
心方隅回面其二天垂其象地曜其文鳳鳴朝陽龍翔景雲
嘉禾重穎蕝莢載分率土咸序人胥悅欣其三恢恢皇度穆

穆聖容言思其順貌思其恭在視斯明在聽斯聰登庸以德
明試以功其四其恭惟何昧且不顯無理不經無義不踐行
捨其華言去其辯游心至虛同規易簡六府孔修九有斯靖
其五澤靡不被化罔不加聲教南暨西漸流沙幽人肆嶮遠
國忘遐越裳重譯充我皇家其六峩峩列辟赫赫虎臣內和
五品外威四賓修時貢職入觀天人備言錫命羽蓋朱輪其
七貽宴好會不常厥數神心所受不言而喻於是肄射弓矢
斯御發彼五的有酒斯飫其八文武之道厥猷未墜在昔先
王射御茲器示武懼荒過亦爲失凡厥羣后無懈于位其九
九日從宋公戲馬臺集送孔令詩五言謝瞻
風至授寒服霜降休百工繁林收陽彩密苑解華叢巢幕無

留鷺遵渚有來鴻輕霞冠秋日迅商薄清穹聖心眷嘉節揚
鑿戾行宮四筵霑芳醴中堂起絲桐扶光迫西汜歡餘宴有
窮逝矣將歸客養素克有終臨流怨莫從歡心歎飛蓬

樂游應詔詩

崇盛歸朝闕虛寂在川岑山梁協孔性黃屋非堯心軒駕時
未肅文囿降照臨流雲起行蓋晨風引鑿音原薄信平蔚臺
澗備曾深蘭池清夏氣修帳含秋陰遵渚攀蒙密隨山土嶺
欽睇目有極覽游情無近尋聞道雖已積年力互頽侵探已
謝丹黻感事懷長林

九日從宋公戲馬臺集送孔令詩

謝靈運

季秋邊朔苦旅鴈違霜雪淒淒陽丹腓皎皎寒潭潔良辰感

聖心雲旗興暮節鳴葭戾朱宮蘭卮獻時哲餞宴光有孚和
樂隆所缺在宥天下理吹萬羣力悅歸客遂海隅脫冠謝朝
列弭掉薄枉渚指景待樂闕河流有急瀾浮駮無緩轍豈伊
川途念宿心愧將別彼美丘園道喟焉傷薄劣

應詔燕曲水作詩四言

顏延之

道隱未形治彰既亂帝迹懸衡皇流共貫惟王創物水錫洪
算仁固開周義高登漢其一祚融世哲業光列聖太上正位
天臨海鏡制以化裁樹之形性惠浸萌生信及翔泳其崇
虛非徵積實莫尚豈伊人和實靈所賦日完其朔月不掩望
航琛越水輦賫踰嶂其二帝體麗明儀辰作貳君彼東朝金
昭玉粹德有潤身禮不愆器柔中淵映芳猷蘭秘其四昔在

文昭今惟武穆烏赫王宰方即居叔有昨獻藩爰履奠牧寧
極和鈞屏京維服其五 卍魄雙交月氣參變開榮灑澤舒虹
燦電化際無間皇情爰眷伊思鎬飲每惟洛宴其六 郊餞有
壇君舉有禮幙帷蘭甸畫流高陛分庭薦樂析波浮醴豫同
夏諺事兼出濟其七 仰閱豐施降惟微物三妨儲隸五塵朝
徽途泰命屯恩充報屈有悔可悛滯瑕難拂其八

皇太子釋奠會作詩

顏延之

國尚師位家崇儒門慕道毓德講藝立言浚明爽曙達義茲
昏永瞻先覺顧惟後昆其一人人長物繼天接聖時也必亨
運蒙則止偃閉武術闡揚文令庶士傾風萬流仰鏡其二 虞
庠節館睿圖炳晬懷仁憬集抱智膺至踵門陳書躡屩獻器

澡身玄淵宅心道秘其 伊昔周儲聿光往記思皇世哲體
元作副資此夙知降從經志返彼前文矩周規值其四 正殿
虛筵司分簡日尚席函扶承疑奉帙侍言稱辭停史秉筆妙
識幾音王載有述其五 肆議芳訊人教克明敬躬祀典告奠
聖靈禮屬觀盥樂薦歌笙昭事是肅俎實非馨其六 獻終襲
吉卽宮廣譙堂設象筵庭宿金懸台保兼徽皇威比彥看乾
酒澄端服整弁其七 六官視命九賓相儀纓笏而序巾卷充
街都莊雲動野馘風馳倫周伍漢超哉邈猗其八 清暉在天
容光必照物性其情理宜其奧安先國胄側聞邦教徒愧微
冥終謝智效其九

侍宴樂游苑送張徐州應詔詩 五言

丘遲

詰日聞闔開馳道聞鳳吹輕黃承玉輦細草藉龍騎風送山
尚響雨息雲猶積巢空初鳥飛荇亂新魚戲寔惟北門重匪
親孰爲寄參差別念舉肅穆恩波被小臣信多幸投生豈酬
義

應詔樂游苑餞呂僧珍詩

沈約

丹浦非樂戰負重切君臨我皇秉至德忘已用亮心愍茲區
宇內魚鳥失飛沈推轂一噴道揚旆九河陰超乘盡三屬選
士皆百金戎車出細柳餞席樽上林命師誅後服投律緩前
禽函轅方解帶堯武稍披襟伐罪止山曲吊民伊水潯將陪
告成禮待此未抽簪

送應氏詩二首

曹植

庚登北芒阪遙望洛陽山洛陽何寂寞宮室盡燒焚垣墉皆
頓擗荆棘上參天不見舊耆老但覩新少年側足無行徑荒
疇不復田遊子久不歸不識陌與阡中野何蕭條千里無人
煙念我平生居氣結不能言其一清時難屢得嘉會不可常
入地無終極人命若朝霜願得展嬖媿我友之朔方親昵並
集送置酒此河陽中饋豈獨薄賓飲不盡觴愛至望苦深豈
不愧中腸山川阻且遠別促會日長願爲比翼鳥施融起高
翔其二

征一官屬送於陟陽侯作詩

孫楚

晨風飄路零雨被秋草傾城遠追送餞我千里道二命皆
有極咄嗟汝可保莫大於鴛子彭聃猶爲夭吉凶如糾纏憂

喜相紛擾。天地爲我鑪。萬物一何小。達人垂大觀。誠此苦不
早。乖離卽長衢。惆悵盈懷抱。孰能察其心。鑒之以蒼昊。齊契
在今朝。守之與偕老。

金谷集作詩

潘岳

王生和鼎實。石子鎮海沂。親友各言邁。中心悵有違。何以叙
離思。携手游郊畿。朝發晉京陽。夕次金谷湄。迴谿繁曲阻。峻
阪路威夷。綠池泛淡淡。青柳何依依。濫泉龍鱗瀾。激波連珠
揮。前庭樹沙棠。後園植烏桯。靈囿繁石榴。茂林列芳梨。飲至
臨華沼。遷坐登隆坻。玄醴染朱顏。但想杯行遲。揚桴撫靈鼓。
簫管清且悲。春榮誰不慕。歲寒良獨希。投分寄石友。白首同
所歸。

王撫軍庚西陽集別作

祇召旋北京。守官反南服。方舟析舊知。對筵曠明收。舉觴矜
飲餞。指途念出行。來晨無定端。別晷有成速。頽陽照通津。夕
陰暖平陸。榜人理行艫。輪軒命歸僕。分手東城園。發櫂西江
澳。離會雖相難。逝川豈往復。誰謂情可書。盡言非尺牘。

謝靈運

祇役出皇邑。相期憩旣越。解纜及流潮。懷舊不能發。析析就
衰林。皎皎明秋月。含情易爲盈。遇物難可歇。積疴謝生慮。寡
欲罕所闕。資此永幽棲。豈伊年歲別。各勉日新志。音塵慰寂
茂。

新亭渚別范零陵詩

謝朓

洞庭張樂地。瀟湘帝子游。雲去蒼梧野。水還江漢流。停驂我
悵望。輟棹子夷猶。廣平聽方籍。茂陵將見求。心事俱已矣。江
水徒離憂。
沈約

別范安成詩

詠史詩

王粲

自古無殉死。達人所共知。秦穆殺三良。惜哉空爾為。結髮事
明君。受恩良不訾。臨沒要之死。焉得不相隨。妻了富門流。兄
弟哭路垂。臨穴呼蒼天。涕下如縷縷。人生各有志。終不為此
移。同知埋身劇。心亦有所施。生為百夫雄。死為壯士規。黃鳥

作悲詩至今聲不虧

三良詩

曹植

功名不可為。忠義我所安。秦穆先下世。三臣皆自殘。生時守
榮樂。既沒同憂患。誰言捐軀易。殺身誠獨難。橫涕登君墓。臨
穴仰天歎。長夜何冥冥。一往不復還。黃鳥為悲鳴。哀哉傷肺
肝。

詠史詩八首

左思

翊冠弁柔翰。卓犖觀羣書。有論准過秦。作賦擬子虛。邊城
鳴鏑羽。檄飛京都。雖非甲冑士。疇昔覽穰苴。長嘯激清風。志
若無東吳。鉞刀貴一割。夢想騁良圖。左眄澄江湘。右盼定羌
胡。功成不受爵。長揖歸田廬。鬱鬱澗底松。離離山上苗。以彼

徑寸莖蔭此百尺條。世胄躋高位，英俊沈下僚。地勢使之然，
由來非一朝。金張藉舊業，七葉再漢貂。馮公豈不偉，白首不
見招。吾希段干木，偃息藩魏君。吾慕魯仲連，談笑却秦軍。當
世貴不羈，遭難能解紛。功成恥受賞，高節卓不羣。臨組不肯
綵，對珪寧肯分。連璽曜前庭，比之猶浮雲。濟濟東城門，赫赫
王侯居。冠蓋蔭四術，朱輪竟長衢。朝集金張館，暮宿許史廬。
南鄰擊鐘磬，北里吹笙竽。寂寂揚子宅，門無卿相輿。寥寥空
宇內，所講在玄虛。言論準宣尼，辭賦擬相如。悠悠百世後，英
名擅八區。皓天舒白日，靈景耀神州。列宅紫宮裏，飛宇若雲
浮。峩峩高門內，藹藹皆王侯。自非攀龍客，何爲歛來游。被褐
出閭闔，高步追許由。振衣千仞岡，濯足萬里流。荆軻飲燕市，

酒酣氣益震，哀歌和漸離。謂若傍無人，雖無壯士節。與世亦
殊倫，高吟逸四海。豪右何足陳，貴者雖自貴，視之若埃塵。賤
者雖自賤，重之若千鈞。士父官不達，骨肉還相薄。買臣困樵
采，仇儷不安宅。陳平無產業，歸來鬻負郭。長卿還成都，壁立
何寥廓。四賢豈不偉，遺烈光篇籍。當其未遇時，憂在填溝壑。
英雄有迤邐，由來自古昔。何世無奇才，遺之在草澤。習習籠
中鳥，舉翮觸四隅。落落窮巷士，抱影守空廬。出門無通路，枳
棘塞中途。計策棄不收，塊若枯池魚。外望無寸祿，內顧無斗
儲。親戚還相蔑，朋友日夜疎。蘇秦北游說，李斯西上書。俛仰
生榮華，咄嗟復彫枯。飲河期滿腹，貴足不願餘。巢林棲一枝，
可爲達士模。

詠史詩

張協

昔在西京時。朝野多歡娛。謫謫東都門。羣公祖疎朱軒墀。
金城供帳臨長衢。達人知止足。遺榮忽如無。抽簪解朝衣。散
髮歸海隅。行人爲隕涕。賢哉此丈夫。揮金樂當年。歲暮不留
儲。顧謂四座賓。多財爲累愚。清風激萬代。名與天壤俱。咄此
蟬冕客。君紳宜見書。

覽古詩

盧諶

趙氏有和璧。天下無不傳。秦人來求市。厥價徒空言。與之將
見賣。不與恐致患。簡才備行李。圖令國命全。藺生在下位。繆
子稱其賢。奉辭馳出境。伏軾拜人關。秦王御殿坐。趙使擁節
前。揮袂睨金柱。身玉要俱捐。連城旣僞往。荆玉亦真還。爰在

澠池會。王烈交歡。昭襄欲負力。相如折其端。背血下。露襟
怒髮上。衝冠西伯。終雙擊東越。不隻彈捨生。豈不易處死。誠
獨難。稜威章臺顛。彌禦亦不干。屈節邯鄲中。俛首忍迴軒。廉
公何爲者。負荆謝厥讐。智勇冠當世。弛張使我歎。

張子房詩

謝瞻

王風哀以思。周道蕩無章。卜洛易隆替。典亂罔不亡。力政吞
九鼎。苛慝暴三殤。息肩纏民思。靈鑒集朱光。伊人感代工。聿
來扶典王。婉婉幙中畫。輝輝天業昌。鴻門銷薄蝕。垓下隕櫓
槍。爵仇建蕭宰。定都護儲皇。肇允契幽叟。翻飛指帝鄉。慧心
奮千祀。清埃播無疆。神武睦三正。裁成被八荒。明兩燭河陰。
慶霄薄汾陽。鑿於歷頽寢。飾像薦嘉嘗。聖心豈徒甄。惟德在

無忘逝者如可作。揆子慕周行。濟濟屬車士。粲粲翰墨場。瞽夫違盛觀。竦踊企一方。四達雖乎直。蹇步愧無良。餐和忘微遠。延首詠太康。

秋胡詩

顏延之

倚梧傾高鳳。寒谷待鳴律。影響豈不懷。自遠每相匹。婉彼幽閑女。作嬪君子室。峻節貫秋霜。明豔侔朝日。嘉運旣我從。欣願自此畢。其一燕居未及好。良人顧有違。脫巾千里外。結綬登王畿。戒徒在昧且。左右來相依。驅車出郊郭。行路正威遲。存爲久離別。沒爲長不歸。其二嗟余怨行役。三陟窮晨暮。嚴駕越瓜寒。解鞍犯霜露。原隰多悲涼。迴飈卷高樹。離獸起荒蹊。驚鳥縱橫去。悲哉游宦子。勞此山川路。其三超遙行人遠。

宛轉年運徂。良時爲此別。日月方向除。孰知寒暑積。僮僮見榮枯。歲暮臨空房。涼風起坐隅。寢興日已寒。白露生庭蕪。其四勤役從歸願。反路遵山河。昔辭秋未素。今也歲載華。蠶月觀時暇。桑野多經過。佳人從所務。窈窕援高柯。傾城誰不顧。弭節停中阿。其五年往誠思勞。路遠濶音形。雖爲五載別。相與昧平生。捨車遵往路。息藻馳目成。南金豈不重。聊自意所輕。義心多苦調。密比金玉聲。其六高節難久淹。竭來空復辭。遲遲前途盡。依依造門基。上堂拜嘉慶。入室問何之。日暮行采歸。物色桑榆時。美人望昏至。慚歎前相持。其七有懷誰能已。聊用申苦難。離居殊年載。一別阻河關。春來無時豫。秋至恒早寒。明發動愁心。閨中起長歎。慘悽歲方晏。日落游子顏。

其八高張生絕絃聲急由調起自昔枉光塵結言固終始如
何久爲別百行愆諸已君子失明義誰與借沒齒愧彼行露
調甘之長川汜其九人望有主漸熾而林林其小自贈流指

五君詠五首登門甚平堂我氣與人定顏延之

阮步兵

阮公雖淪跡識密鑿亦洞沈醉似埋照寓辭類託諷長嘯若
懷人越禮自驚衆物故不可論途窮能無慟

嵇中散

中散不偶世本自餐霞人形解駁默仙吐論知凝神立俗迂
流議尋仙洽隱淪鸞翮有時鍛龍性誰能馴

劉參軍

劉伶淳閉關懷情滅聞見鼓鐘不足歡榮色豈能眩韜精日
沈飲誰知非荒宴頌酒雖短章深衷自此見

阮始平

仲容青雲器實稟生民秀建音何用深識微在金奏郭奕已
心醉山公非虛觀屢薦不入官一麾乃出守

向常侍

向秀甘淡薄深心託毫素探道好淵玄觀書鄙章句交別既
鴻軒擊嵇亦鳳舉流連河裏游惻愴山陽賦

詠史詩

鮑昭

五都矜財雄三川養聲利百金不市死明經有高位京城十
二衢飛甍各鱗次仕子影華纓遊客竦輕轡明星晨未稀軒

蓋已雲至賓御紛颯杳鞍馬光照地寒暑在一時繁華及春媚君平獨寂寞身世兩相棄

詠霍將軍北伐詩

虞子陽

擁旄爲漢將汗馬出長城長城地勢險萬里與雲平涼秋八月虜騎入幽并飛狐白日晚瀚海愁雲生羽書時斷絕刁斗晝夜驚乘墉揮寶劍蔽日引高旂雲屯七萃士魚麗六郡兵胡笳關下思羌笛隴頭鳴骨都先自讐日逐次亡精玉門罷斥候甲第始修營位登萬庾積功立百行成天長地自久人道有虧盈未窮激楚樂已見高臺傾當令麟閣上載有雄名

百一詩

應璩

下流不可處君子慎厥初名高不宿著易用受侵誣前者隳官去有人適我問田家無所有酌醴焚枯魚問我何功德三入承明廬所占於此上是謂仁智居文章不經國筐篋無尺書用等稱才學往往見歎譽避席跪自陳賤子實空虛宋人遇周客慚媿靡所如

遊仙詩

何劭

青青陵上松亭亭高山栢光色冬夏茂根柢無彫落吉士懷貞心悟物思遠託揚志玄雲際流日矚巖石羨昔上子喬友道發伊洛迢遞陵峻岳連翩御飛鶴抗跡遺萬里豈戀生人樂長懷慕仙類眩然心綿邈

遊仙詩七首

郭璞

京華遊俠窟。山林隱遯棲。朱門何足榮。未若託蓬萊。臨源挹
清波。凌岡掇丹英。靈谿可潛盤。安事登雲梯。漆園有傲吏。萊
氏有逸妻。進則保龍見。退爲觸藩抵。高蹈風塵外。長揖謝夷
齊。青谿千餘仞。中有一道士。雲生梁棟間。風出窻戶裏。借問
此何誰。云是鬼谷子。翹迹企頓陽。臨河思洗耳。聞闔西南來。
潛波漁鱗起。靈妃顧我笑。粲然啓玉齒。蹇修時不存。要之將
誰使。翡翠戲蘭苕。容色更相鮮。綠蘿結高林。蒙籠蓋一山中。
有冥寂士。靜嘯撫清絃。放情凌霄外。嚼藥挹飛泉。赤松臨上
游。駕鴻乘紫煙。左挹浮丘袖。右拍洪崖肩。借問蜉蝣輩。寧知
龜鶴年。六龍安可頓。運流有代謝。時變感人思。已秋復願夏。
淮海變微禽。吾生獨不化。雖欲騰丹谿。雲螭非我駕。愧無魯

陽德。廻日向三舍。臨川哀年邁。撫心獨悲吒。逸翮思拂霄。迅
足羨遠游。清源無增瀾。安得運吞舟。珪璋雖特達。明月難闇
投。潛穎怨青陽。陵苕哀素秋。悲來惻丹心。零淚緣纓流。雜縣
寓魯門。風煖將爲災。吞舟涌海底。高浪駕蓬萊。神仙排雲出。
但見金銀臺。陵陽挹丹溜。容成揮玉杯。姮娥揚妙音。洪崖領
其頤。升降隨長煙。飄飄戲九垓。奇齡邁五龍。千歲方嬰孩。燕
昭無靈氣。漢武非仙才。晦朔如循環。月盈已復魄。蓐收清西
陸。朱羲將由白。寒露拂陵苕。女蘿辭松柏。薨榮不終朝。蜉蝣
豈見夕。圓丘有奇草。鍾山出靈液。王孫列八珍。安期鍊五石。
長揖當途人。去來山林客。

招隱詩二首

左思

杖策招隱士。荒塗橫古今。巖穴無結構。丘中有鳴琴。白雲停
陰岡。丹葩耀陽林。石泉漱瓊瑤。纖鱗或浮沉。非必絲與竹。山
水有清音。何事待嘯歌。灌木自悲吟。秋菊兼糗糧。幽蘭間重
襟。躊躇足力煩。聊欲投吾簪。經始東山廬。果下自成蹊。前有
寒泉井。聊可瑩心神。峭蒨青蔥間。竹栢得其真。弱葉棲霜雪。
飛榮流餘津。爵服無常玩。妍惡有屈伸。結綬生纏牽。彈冠去
埃塵。惠連非吾屈。首陽非吾仁。相與觀所尚。逍遙撰良辰。

招隱詩

陸機

明發心不夷。振衣聊躑躅。躑躅欲安之。幽人在浚谷。朝采南
澗藻。夕息西山足。輕條象雲構。密葉成翠幄。激楚佇蘭林。回
芳薄秀木。山溜何泠泠。飛泉漱鳴玉。哀音附靈波。頽響赴曾
曲。至樂非有假。安事澆淳樸。富貴苟難圖。稅駕從所欲。

反招隱詩

王康琚

小隱隱陵藪。大隱隱朝市。伯夷竄首陽。老聃伏柱史。昔在太
平時。亦有巢居子。今雖盛明世。能無中林士。放神青雲外。絕
迹窮山裏。鷓鴣先晨鳴。哀風迎夜起。凝霜凋朱顏。寒泉傷玉
趾。周才信衆人。偏智任諸已。推分得天和。矯性失至理。歸來
安所期。與物齊終始。

芙蓉池作

魏文帝

秉輦夜行遊。逍遙步西園。雙渠相溉灌。嘉木繞通川。卑枝拂
羽蓋。修條摩蒼天。驚風扶輪轂。飛鳥翔我前。丹雘夾明月。華
星出雲間。上天垂光采。五色一何鮮。壽命非松喬。誰能得神

仙遊遊快心意保已終百年

益南州桓公九井作

殷仲文

四運雖鱗次理化各有準獨有清秋日能使高興盡景氣多
明風物自凄緊爽籟驚幽律哀壑叩虛牝歲寒無早秀浮
榮甘夙隕何以標貞脆薄言寄松菌哲匠感蕭晨肅此塵外
廣庭散泛愛逸爵紆勝引伊余樂好仁惑祛吝亦泯猥首
衡朝將貽匈奴

游西池

謝混

悟彼蟋蟀唱信此勞者歌有來豈不疾良遊常蹉跎逍遙越
城肆願言屢經過迴軒被陵闕高臺眺飛霞惠風蕩繁囿白
雲屯會阿景景鳴禽集水木湛清華褰裳順蘭沚徙倚引芳

柯美人愆歲月遲暮獨如何無為牽所思南榮戒其多

泛湖歸山樓中翫月

謝惠連

日落泛澄瀛星羅浮輕橈憩謝面曲汜臨流對迴潮輟策共
駢筵並坐相招要哀鴻鳴沙渚悲猿響山椒亭亭映江月瀏
瀏出谷飈斐斐氣幕岫泫泫露盈條近矚祛幽蘊遠視盪澁
鷺昭言不知罷從夕至清朝

從游京口北固應詔

謝靈運

玉璽戒誠信黃屋示崇高事為名教用道以神理超昔聞汾
水游今見塵外鑣鳴笳發春渚稅鑿登山椒張紉眺倒景列
筵矚歸潮遠巖映蘭薄白日麗江臯原隰萬綠柳墟囿散紅
桃皇心美陽澤萬象咸光昭顧已枉維繫撫志慚場苗工拙

各所宜終以反林巢。曾是繁舊想。覽物奏長謠。

晚出西射堂

謝靈運

步出西城門。遙望城西岑。連障疊巘嶮。嘯嘒青翠杳。深沈曉霜楓。葉丹夕曛嵐。氣陰節往感。不淺感來念。已深羈雌戀。舊侶迷鳥懷。故林含情尚勞愛。如何離賞心。撫鏡華緇鬢。攬帶緩促袵。安排徒空言。幽獨賴鳴琴。

登池上樓

謝靈運

潛虬媚幽姿。飛鴻響遠音。薄霄愧雲浮。棲川怍淵沈。進德智所拙。退耕力不任。狗祿反窮海。臥疴對空林。衾枕昧節候。褰闥暫窺臨。傾耳聆波瀾。舉目眺嶠嶽。初景革緒風。新陽改故陰。池塘生春草。園柳變鳴禽。祁祁傷幽歌。萋萋感楚吟。索居易

遊南亭

謝靈運

易永久。離群難處心。持操豈獨占。無悶徵在今。時竟夕澄霽。雲歸日西馳。密林含餘清。遠峯隱半規。久海昏墊苦。旅館眺郊岐。澤蘭漸被徑。芙蓉始發池。未厭青春好。已覩朱明移。感感感物歎。星星白髮垂。藥餌情所止。衰疾忽在斯。逝將候秋水。息景偃舊崖。我志誰與亮。賞心惟良知。

遊赤石進帆海

謝靈運

首夏猶清和。芳草亦未歇。水宿淹晨暮。陰霞屢興沒。周覽倦瀛孺。况乃凌窮髮。川后時安流。天吳靜不發。揚帆采石華。挂席拾海月。溟漲無端倪。虛舟有超越。仲連輕齊組。子牟眷魏闕。矜名道不足。適已物可忽。請附任公言。終然謝天伐。

石壁精舍還湖中作

謝靈運

昏且變氣候。山水含清暉。清暉能娛人。游子憺忘歸。出谷日尚早。入舟陽已微。林壑斂暝色。雲霞收夕霏。芰荷迭映蔚。蒲稗相因依。披拂趨南徑。愉悅偃東扉。慮澹物自輕。意極理無違。寄言攝生客。試用此道推。

登石門最高頂

謝靈運

晨策尋絕壁。夕息在山棲。疏峯抗高館。對嶺臨迴谿。長林羅戶庭。積石擁基階。連巖覺路塞。密竹使徑迷。來人忘新術。去子感故蹊。活活夕流駛。噉噉夜猿啼。沈冥豈別理。守道自不携。心契九秋餘。目翫三春美。居常以待終。處順故安排。惜無同懷客。共登青雲梯。

於南山往北山經湖中瞻眺

謝靈運

朝旦發陽崖。景落憩陰峯。舍舟眺迥渚。停策倚茂松。側徑既窈窕。環洲亦玲瓏。俛視喬木杪。仰聆大壑淙。石橫水分流。林密蹊絕蹤。解作竟何感。升長皆手容。初篁苞綠籜。新蒲含紫茸。海鷗戲春岸。天雞弄和風。撫化心無厭。覽物眷彌重。不惜去人遠。但恨莫與同。孤游非情歎。賞廢理誰通。

從斤竹澗越嶺溪行

謝靈運

猿鳴誠知曙。谷幽光未顯。巖下雲方合。花上露猶沾。逶迤傍隈隩。迢遞陟陁峴。過澗既厲急。登棧亦凌緬。川渚屢逕復。乘流翫迴轉。蘋萍泛沈深。菰蒲冒清淺。企石挹飛泉。攀林摘葉卷。想見山阿人。薜蘿若在眼。握蘭勤徒結。折麻心莫展。情用

賞爲美事昧竟誰辨觀此遺物慮一悟得所遺

應詔觀北湖田收

顏延之

周御窮轍跡夏載歷山川蓄軫豈明懋善游皆聖仙帝暉膺
順動清蹕巡廣廡樓觀眺豐穎金駕映松山飛奔互流綴緹
散代廻環神行埒浮景爭光溢中天開冬春徂物殘悴盈化
先陽陸團精氣陰谷曳寒煙攢素旣森藹積翠亦蔥芊息饗
報嘉歲通急戒無年溫渥浹典隸和惠屬後筵觀風久有作
陳詩愧未妍疲弱謝凌遽取累非繼牽

車駕幸京口侍游蒜山作

顏延之

元天高北列日觀臨東溟入河起陽峽踐華以削成巖險去
漢宇襟衛徒吳京流池自化造山關固神管園縣極方望邑

社總地靈宅道炳星緯誕曜應辰明睿思纏故里巡駕市舊
坳陟峯騰輦路尋雲抗瑤薨春江壯風濤蘭野茂萸英宜游
弘下濟窮遠凝聖情岳瀆有和會祥習在下征周南悲昔老
留滯感遺萌空食疲廊肆反稅事巖耕

車駕幸京口三月三日侍遊曲阿後湖作

顏延之

虞風載帝狩夏諺頌王遊春方動宸駕望幸傾五州山祗蹕
嶠路水若警滄流神御出瑤軫天儀降藻舟萬軸胤行衛千
翼泛飛浮彫雲麗璇蓋祥飈被綵旂江南進荆豔河激獻趙
謳金練照海浦笳鼓震溟洲藐盼觀青崖衍漾觀綠疇民靈
騫都野鱗翰聳淵丘德禮旣普洽川岳徧懷柔

行樂至城東橋

鮑昭

雞鳴關吏起。伐鼓早通晨。嚴車臨廻陌。延瞰歷城闔。蔓草緣
高隅。修楊夾廣津。迅風首且發。平路塞飛塵。擾擾遊宦子。管
管市井人。懷金近從利。撫劍遠辭親。爭先萬里途。各事百年
身。開芳及稚節。含彩吝驚春。尊賢永照灼。孤賤長隱淪。容華
坐消歇。端為誰苦辛。

遊東田

謝朓

戚戚苦無悰。携手共行樂。尋雲陟累榭。隨山望菌閣。遠樹曖
阡阡。生煙紛漠漠。魚戲新荷動。鳥散餘花落。不對芳春酒。還
望青山郭。

從冠軍建平王登廬山香爐峯

江淹

廣成愛神鼎。淮南好月經。此山具鸞鶴。往來盡仙靈。瑤草正
翕施。玉樹信蔥青。絳氣下縈薄。白雲上杳冥。中坐瞰蜿蜒。俛
伏視流星。不尋退怪極。則知耳目驚。日落長沙渚。曾陰萬里
生。藉蘭素多意。臨風默含情。左學松柏隱。羞逐市井名。幸承
光詠末。伏思託後旌。

鍾山詩應西陽王教

沈約

靈山紀地德。險峭資岳靈。終南表秦觀。少室邈王城。翠鳳翔
淮海。衿帶繞神祠。北阜何其峻。林薄杳蔥青。其發地多奇。
嶺于雲非一狀。合沓共隱天。參差互相望。鬱律構丹巘。峻嶒
起青嶂。勢隨九疑高。氣與三山壯。其二。卽事既多美。臨眺殊
復奇。南瞻儲胥觀。西望昆明池。山中咸可悅。賞逐四時移。春

光發龍首。秋風生桂枝。其三多值息心。侶結架山之足。八解
鳴澗流。四禪隱巖曲。窈冥終不見。蕭條無可欲。所願從之遊。
寸心於此足。其四君王挺逸趣。羽旆臨崇基。白雲隨玉趾。青
霞雜桂旗。淹留訪五藥。顧步佇三芝。於焉仰鍊駕。歲暮以爲
期。其五

宿東園

沈約

陳王鬪雞道。安仁采樵路。東郊豈異昔。聊可閑余步。野徑旣
盤紆。荒阡亦交互。槿籬疎復密。荆扉新且故。樹頂鳴風颭。草
根積霜露。驚麝去不息。征鳥時相顧。茅棟嘯愁鳴。平岡走寒
兔。夕陰帶曾阜。長煙引輕素。飛光忽我過。豈止歲云暮。若蒙
西山藥。顏齡儻能度。

游沈道士館

沈約

秦皇御宇宙。漢帝恢武功。懽娛人事盡。情性猶未充。銳意三
山上。託慕九霄中。旣表祈年觀。復立望仙宮。寧爲心好道。直
由意無窮。日余知止足。是願不須豐。遇可淹留處。便欲息微
躬。山嶂遠重疊。竹樹近蒙籠。開衿濯寒水。解帶臨清風。所累
非外物。爲念在玄空。朋來握石髓。賓至駕輕鴻。都令人徑絕。
唯使雲路通。一舉凌倒景。無事適羣嵩。寄言賞心客。歲暮爾
來同。

古意酬到長史溉登琅邪城

徐悱

甘泉警烽候。上谷抵樓蘭。此江稱豁險。茲山復鬱盤。表裏窮
形勝。襟帶盡巖巒。修篁壯下屬。危樓峻上干。登陣起遐望。迴

首見長安金溝朝灞。潼道入駕鸞。鮮車駑華。鞍汗馬。躍銀
鞍。少年負壯氣。耿介立衝冠。懷紀燕山石。思開函谷。九豈如
霸上戲。羞取路傍觀。寄言封侯者。數奇良可歎。

詠懷詩十七首

阮籍

夜中不能寐。起坐彈鳴琴。薄帷鑿明月。清風吹我襟。孤鴻號
外野。翔鳥鳴北林。徘徊將何見。憂思獨傷心。
一如遊江濱。逍遙順風翔。交甫懷環珮。宛孌有芬芳。荷靡情歡
愛。千載不相忘。傾城迷下蔡。容好結中腸。感激生憂思。萱草
樹蘭房。膏沐爲誰施。其雨怨朝陽。如何金石交。一旦更離傷。
嘉樹下成蹊。東園桃李與李。秋風吹飛藿。零落從此始。繁華有
憔悴。堂上生荆杞。驅馬舍之去。去上西山趾。一身不自保。何

况戀妻子。凝霜被野草。歲暮亦云已。

昔日繁華子。安陵與龍陽。天天桃李灼灼。有輝光。悅懌若
九春。聲折似秋霜。流盼發姿媚。言笑吐芬芳。携手等歡愛。宿
昔同衣裳。願爲雙飛鳥。比翼共翱翔。丹青著明誓。永世不相
忘。

天馬出西北。由來從東道。春秋非有託。富貴焉常保。清露被
臯蘭。凝霜霑野草。朝爲媚少年。夕暮成醜老。自非七子。曾誰
能常美好。

登高臨四野。北望青山阿。松柏鬢鬢。飛鳥鳴相過。感慨懷
辛酸。怨毒常苦多。李公悲東門。蘇子狹三河。求仁自得仁。豈
復歎咨嗟。

開秋北涼氣。蟋蟀鳴床帷。感物懷殷憂。悄悄令心悲。多言焉
所告。繁辭將訴誰。微風吹羅袂。明月耀清暉。晨雞鳴高樹。命
駕起旋歸。

平生少年時。輕薄好絃歌。西游咸陽中。趙李相經過。娛樂未
終極。白日忽蹉跎。驅馬復來歸。反顧望三河。黃金百鎰盡。資
用常苦多。北臨人行道。失路將如何。

昔聞東陵瓜。近在青門外。連畛距阡陌。子母相鉤帶。五色曜
朝日。嘉賓四面會。膏火自煎熬。多財爲患害。布衣可終身。寵
祿豈足賴。

步出上東門。北望首陽岑。下有采薇士。上有嘉樹林。良辰在
何許。凝霜霑衣襟。寒風振山阿。玄雲起重陰。鳴鴈飛南征。鷓

鴉發哀音。素質由商聲。悽愴傷我心。

昔年十四五。志尚好書詩。彼褐懷珠玉。顏闕相與期。開軒臨
四野。登高有所思。白草蔽山阿。萬代同一時。千秋萬歲後。榮
名安所之。乃悟羨門子。嗷嗷今自嗤。

徘徊蓬池上。還顧望大梁。綠水揚洪波。曠野莽茫茫。走獸交
橫馳。飛鳥相隨翔。是時鷓鴣火中。日月正相望。朔風厲嚴寒。陰
氣下微霜。羈旅無疇匹。俛仰懷哀傷。小人計其功。君子道其
常。豈惜終憔悴。詠言著斯章。炎暑惟茲夏。三旬將欲移。芳樹
垂綠葉。清雲自逶迤。四時更代謝。日月遞差馳。徘徊空堂上。
惻怛莫我知。願覩卒歡好。不見悲別離。

灼灼西頽日。餘光照我衣。迴風吹四壁。寒鳥相因依。周周尚

猶羽蚤蚤亦念飢如何當路子。聲折志所歸豈爲夸譽名。憔悴使心悲寧與鸞雀翔不隨黃鵠飛黃鵠游四海中路將安歸。

獨坐空堂上誰可與歡者出門臨永路不見行車馬登高望九州悠悠分曠野孤鳥西北飛離獸東南下日暮思親友晤言用自寫。

北里多奇舞濮上有微音輕薄閑游子俯仰乍浮沉捷徑從狹路僂倪趣荒淫焉見王子喬乘雲翔鄧林獨有延年術可以慰我心。

湛湛長江水上有楓樹林。皋蘭被徑路青驪逝駸駸遠望令人悲春氣感我心。楚多秀士朝雲進荒淫朱華振芬芳高

蔡相追尋 爲黃雀哀涕下誰能禁

秋懷詩

謝惠連

平生無志意少小嬰憂患如何乘苦心矧復值秋晏皎皎天月明奕奕河宿爛蕭瑟含風蟬寥唳度雲鴈寒商動清閨孤燈暖幽幔耿介繁慮積展轉長宵半夷險難預謀倚伏昧前算雖好相如達不同長卿慢頗悅鄭生偃無取白衣宦未知古人心且從性所翫質至可命觴朋來當染翰高臺驟登踐清波時陵亂頽魄不再圓傾義無兩日金石終銷毀丹青豔彫煥各勉玄髮歡無貽白首歎因歌遂成賦聊用布親串

臨終詩

歐陽建

伯陽適西戎孔子欲居蠻苟懷四方志所在可游盤况乃遭

屯蹇顛沛遇災患古人達機兆策馬遊近關咨余冲且暗抱
責守微官潛圖密已構成此禍福端恢恢六合間四海何
寬天網布絃綱投足不獲安松栢隆冬瘁然後知歲寒不涉
太行險誰知斯路難真偽因事顯人情難豫觀窮達有定分
慷慨復何歎一負慈母恩痛酷摧心用下顧所憐女惻惻心
中酸一子棄若遺念皆遺凶殘不惜一身死惟此如循環執
紙五情塞揮筆涕洟瀾

幽憤詩四言

嵇康

嗟余薄祜少遭不造哀焚靡識越在襁褓母兄鞠育有慈無
威侍愛肆姐不訓不師爰及冠帶憑寵自放抗心希古任其
所向託好老壯賤物貴身志在守樸養素全貞曰余不敏好

善聞人子下之敗屢增惟塵大人含弘藏垢懷恥民之多僻
政不由己惟此褊心顯明藏否感悟思怨怛若創痛欲寡其
過謗議沸騰性不傷物頻致怨憎昔慚柳惠今愧孫登內負
宿心外慙良朋仰慕嚴鄭樂道閒居與世無營神氣安如咨
子不淑嬰累多虞匪降自天寔由頑疎理蔽患結卒致囹圄
對答鄙訊繫此幽阻實恥訟寃時不我與雖日義直神辱志
沮澡身滄浪豈能補嗚嗚鴈奮翼北游順時而動得意
忘憂嗟我憤歎曾莫能儔事與願違遣茲淹留窮達有命亦
又何求古人有言善莫近名奉時恭默咎悔不生萬石周慎
安親保榮世務紛紜祇攬予情安樂必誠乃終利貞煌煌靈
芝一年三秀子獨何為有志不就懲難思復心焉內疚庶勗

將來無馨無臭。采薇山阿。散髮巖岫。永嘯長吟。願伴養壽。

七哀詩 五言

曹植

明月照高樓。流光正徘徊。上有愁思婦。悲歎有餘哀。借問歎者誰。言是宕子妻。君行踰十年。孤妾常獨棲。君若清路塵。妾若濁水泥。浮沉各異勢。會合何時諧。願爲西南風。長逝入君懷。君懷良不開。賤妾當何依。

七哀詩 二首

王粲

西京亂無象。豺虎方遘患。復棄中國去。遠身適荆蠻。親戚對我悲。朋友相追攀。出門無所見。白骨蔽平原。路有飢婦人。抱子棄草間。顧聞號泣聲。揮涕獨不還。未知身死處。何能兩相完。驅馬棄之去。不忍聽此言。南登霸陵岸。迴首望長安。悟彼

下泉人喟然傷心肝

荆蠻非我鄉。何爲久滯淫。方舟溯大江。日暮愁我心。山岡有餘暎。巖阿增重陰。狐狸馳赴穴。飛鳥翔故林。流波激清響。猿猴臨岸吟。迅風拂裳袂。白露霑衣襟。獨夜不能寐。攝衣起撫琴。絲桐感人情。爲我發悲音。羈旅無終極。憂思壯難任。

七哀詩 二首

張載

北芒何岵岵。高陵有四五。借問誰家墳。皆云漢世主。恭文遙相望。原陵鬱膺膺。季世喪亂起。賊盜如豺虎。毀壤過一抔。便房啓幽戶。珠柙離玉體。珍寶見剽虜。園寢化爲墟。周墉無遺堵。蒙龍荆棘生。蹊徑登童豎。狐兔窟其中。燕穢不復掃。頽隴金甕發。萌蘗營農圃。昔爲萬乘君。今爲丘山土。感彼雍門言。

悽愴哀往古

秋風吐商氣。蕭瑟掃前林。陽鳥收和響。寒蟬無餘音。白露中
夜結。木落柯條森。朱光馳北陸。浮景忽西沉。顧望無所見。唯
觀松柏陰。蕭蕭高桐枝。翩翩棲孤禽。仰聽離鴻鳴。俯聞蜻蚓
吟。哀人易感傷。觸物增悲心。丘隴日已遠。纏綿彌思深。憂來
令髮白。誰云愁可任。徘徊向長風。淚下霑衣襟。

悼亡詩三首

潘岳

荏苒冬春謝。寒暑忽流易。之子歸窮泉。重壤永幽隔。私懷誰
克從。淹留亦何益。僮俛恭朝命。廻心反初役。望廬思其人。入
室想所歷。幃屏無髣髴。翰墨有餘跡。流芳未及歇。遺挂猶在
壁。悵恍如或存。周惶忡驚惕。如彼翰林鳥。雙棲一朝隻。如彼

游川魚。比目中路析。春風綠隄來。晨雷承簷滴。寢息何時忘。
沉憂日盈積。庶幾有時衰。壯年猶可擊。

皎皎窓中月。照我室南端。清商應秋至。溽暑隨節闌。涼涼
風。升始覺。夏衾單。豈曰無重纒。誰與伺歲寒。歲寒無與同。朗
月何朧朧。展轉盼枕席。長簟竟牀空。牀空委清塵。室虛來悲
風。獨無李氏靈。髣髴覩爾容。撫襟長歎息。不覺涕霑曾。霑曾
安能已。悲懷從中起。寢興日存形。遺音猶在耳。上慚東門吳。
下愧蒙莊子。賦詩欲言志。此志難具紀。命也可奈何。長戚自
令鄙。

騷靈運天機。四節代遷逝。凄凄朝露凝。烈烈夕風厲。奈何悼
淑儷。儀容永潛翳。念此如昨日。誰知已卒歲。改服從朝政。哀

心寄私制茵幃張故房朔望臨爾祭爾祭詎幾時朔望忽復
盡衾裳一毀撤千載不復引壘壘暮月周戚戚彌相愍悲懷
感物來泣涕應情隕駕言陟東阜望墳思紆軫徘徊墟墓間
欲去復不忍徘徊不忍去徙倚步踟躕落葉委埏側枯荻帶
墳隅孤魂獨煢煢安知靈與無投心遵朝命揮涕強就車誰
謂帝宮遠路極悲有餘

廬陵王墓下作

謝靈運

曉月發雲陽落日次朱方含悽泛廣川灑淚眺連岡眷言懷
君子沉痛結中腸道消結憤懣運開申悲涼神期恒若存德
音初不忘徂謝易永久松柏森已行延州協心許楚老惜蘭
芳解劍竟何及撫墳徒自傷平生疑若人通蔽互相妨理感
深情慟定非識所將脆促良可哀天枉特兼常一隨往化滅
安用空名揚舉聲泣已灑長歎不成章

拜陵廟作

顏延之

周德恭明祀漢道遵光靈哀敬隆祖廟崇樹加園塋逮事休
命始投迹階王庭陪廁廻天顧朝讌流聖情早服身義重晚
達生戒輕否來王澤竭泰往人悔形勅躬慚積素復與昌運
并恩合非漸漬榮會在逢迎風御嚴清制朝駕守禁城束紳
入西寢伏軾出東明衣冠終冥漠陵邑轉蔥青松風遵路急
山煙冒壠生皇心憑容物民思被歌聲萬紀載絃吹千載託
旒旌未殊帝世遠已同淪化萌幼壯困孤介未暮謝幽貞發
軌喪夷易歸軫慎崎傾

同謝諮議銅爵臺詩

謝朓

繡帷飄井幹。樽酒若平生。鬱鬱西陵樹。詎聞歌吹聲。芳襟染
淚迹。嬋媛空復情。玉座猶寂寞。况乃妾身輕。

出郡傳舍哭范僕射

任昉

平生禮數絕。式瞻在國楨。一朝萬化盡。猶我故人情。待時屬
興運。王佐俟民英。結歡三十載。生死一交情。携手道衰孽。接
景事休明。運阻衡言革。時泰玉階平。濬冲得茂彥。夫子值在
生。伊人有涇渭。非余揚濁清。將乖不忍別。欲以遣離情。不忍
一辰意。千齡萬恨生。其一已矣平生事。詠歌盈篋笥。兼復相
嘲謔。常與虛舟值。何時見范侯。還叙平生意。其二與子別幾
辰。經塗不盈旬。弗覩朱顏改。徒想平生人。寧知安歌日。非君

撒瑟晨已矣余何歎輟春哀國均其三

